


www.vares.info



Broj 7, **12.10. 2010**, BESPLATAN PRIMJERAK

Informativni bilten Općine Vareš



Jesen u Varešu

PUŠTEN U FUNKCIJU VODOVOD U MZ BUDOŽELJE

Dana 29. 09. 2010. godine, u Domu kulture MZ «Budoželje», je upriličeno svečano puštanje u funkciju vodovoda sa izvora «Zubetsko vrelo».

Izgradnja vodovoda je počela u jesen 2005. godine, a u proteklom periodu su radovi privedeni kraju tako da je vodovod pušten u funkciju.

Sredstva za izgradnju ovog vodovoda je osigurala Vlada Zeničko-dobojskog kantona preko Ministarstva za poljoprivredu, šumarstvo i vodoprivredu ZDK u iznosu od 620.000 KM, a Federalno ministarstvo poljoprivrede, vodoprivrede i šumarstva 65.000 KM, tako da je ukupna vrijednost ovog projekta 685.000 KM.

Općina Vareš je svoj doprinos dala na način da je finansirala reviziju projekta i troškove analize vode.

Svečanosti puštanja u funkciju vodo-

voda su prisustvovali: ministrica Ministarstva za poljoprivredu, šumarstvo i vodoprivredu Zeničko-dobojskog kantona Mirzeta Džonlagić, načelnik Općine Vareš gosp. Hamdo Fatić, predsjedavajući Općinskog vijeća gosp. Josip Malbašić, predstavnici Savjeta MZ «Budoželje» te veliki broj građana Budoželja.

Prisutnima se na početku obratio Emir Islamović ispred Savjeta MZ Budoželje, a uslijedila su obraćanja općinskog načelnika i ministrice Džonlagić.

Općinski načelnik je u svom obraćanju između ostalog rekao: „okončan je jedan veoma važan projekat za Budoželje, svjestan sam da je bilo određenih propusta koji su usporavali bržu i efikasniju realizaciju ovog projekta, ali da je u ovom trenutku najvažnije da je izgradnja uspješno

završena i da je Budoželje dobilo visokokvalitetnu i zdravu vodu, tako da je za mene danas, najsretniji dan u životu, a znam da je i za stanovnike Budoželja. Uvijek sam bio svjestan problema sa kojima se susreću stanovnici Budoželja i ne samo to, nego sam svjestan u kojoj mjeri će ovaj vodovod doprinijeti razvoju mjesne zajednice i seoskog turizma koji je do ovog trenutka bio zapostavljen upravo iz razloga slabe snabdjevenosti pitkom vodom dvadeset i četiri sata“.

Ministrica Džonlagić je izrazila zadovoljstvo što je jedan veliki projekat od vitalnog značaja za ovu mjesnu zajednicu i njene stanovnike uspješno priveden kraju, uz nadu da će on prije svega olakšati život Budoželjacima i doprinijeti razvoju mjesne zajednice u svim segmentima.





SVEČANO OTVORENJE ZGRADE OŠ „VAREŠ“

21. septembra 2010. godine na platu ispred Osnovne škole „Vareš“ upriličena je svečanost povodom rekonstrukcije škole koja je trajala u toku ljetnih raspusta 2009. i 2010. godine.

Sredstva za obnovu u ukupnom iznosu od 740.000 USD osigurao je Ured za saradnju u oblasti odbrane (ODC) Ambasade SAD-a u BiH.

Radove na rekonstrukciji i ugradnji elektro instalacija, komunikacijskog i sigurnosnog sistema u školi izvodili su pripadnici Nacionalne garde i američke vojske iz država Texas, Maryland i Idaho u saradnji s pripadnicima Oružanih snaga BiH.

Njegova ekscelencija Patrick Moon, ambasador Sjedinjenih Američkih Država u Bosni i Hercegovini u svom govoru posebno je istaknuo da je ponosan na pripadnike nacionalne garde koji su neumorno radili na obnovi škole i zajedno sa vojskom BiH stvorili uvjete za obrazovanje djece u sigurnom i ugodnom ambijentu.

Načelnik Zajedničkog odjeljenja OS BiH general-pukovnik Miladin Miložić također je pozdravio sve prisutne i u svom govoru rekao da je vojska iz BiH zajedno s američkom vojskom uradila slične projekte obnove školskih zgrada u općinama Foča i Vlasenica.

Okupljenima se obratio i direktor Osnovne škole „Vareš“ Muris Parić koji je zahvalio svima koji su na bilo koji način sudjelovali u obnovi škole.

Vareški načelnik Hamdo Fatić je američkom ambasadoru uz zahvale uručio i tzv. „Vareškog oscara“ – statuu vareškog livca, te prigodne zahvalnice zapovjednicima OS BiH i Nacionalne garde američke vojske.

Veliki broj zvanica, među kojima je bila i Zdenka Merdžan – ministrica obrazovanja, nauke kulture i sporta Zeničko-dobojskog kantona, pred-

stavnici Pedagoškog zavoda Zenica, Terenskog ureda OESS-a iz Zenice, uveličale su ovaj događaj.

U kulturno-umjetničkom dijelu programa vareški osnovci su se gostima predstavili s nekoliko pjesama školskog hora i nastupom folklorne grupe.

POTPISAN UGOVOR O REKONSTRUKCIJI DIJELA LOKALNE CESTE VAREŠ – OČEVIJA – LIGATIĆI – OLOVO

Dana 06. 09. 2010. godine u Zenici je zaključen Ugovor o rekonstrukciji dijela lokalne ceste Vareš – Očevija – Ligatići – Olovo, između Kantonalne direkcije za ceste Zeničko-dobojskog kantona - Naručilac, Općine Vareš - Naručilac i izvođača radova GPD „Krivaja-gradnja“ d.o.o. Zavidovići.

U Ugovoru se izvođač obavezuje da radove koji su predmet ovog Ugovora izvrši prema projektnoj dokumentaciji, opisu, nacrtima, predmjeru i predračunu radova.

Općina kao naručilac se obavezuje da će izvođaču radova obezbijediti tehničku i građevinsku dokumentaciju, kao i potrebna odobrenja za izvođenje radova.

Naručilac Direkcija za ceste će Izvođaču za izvršene radove koji su predmet ovog Ugovora isplatiti cijenu u iznosu od 294.617,16 KM i to na slijedeći način:

- dio ugovorenog iznosa u visinu od 200.000,00 KM iz Programa investiranja sredstava naplaćenih izdavanjem GSM licence za 2008. godinu i dijela sredstava za 2009. godinu, u skladu sa Odlukom Vlade Federacije BiH, broj: 499/10 od 24. 05. 2010. godine;

- preostali dio ugovorenog iznosa u visini od 94.617,16 KM iz sredstava odobrenih Odlukom o načinu

korištenja raspoloživih sredstava sa ESCROW računa („Službene novine Zeničko-dobojskog kantona“ broj: 03/10) i zaključka Vlade Zeničko-dobojskog kantona broj: 02-14-17714/10 od 11. 06. 2010. godine.

UGOVOR O IZVOĐENJU RADOVA NA CESTOVNOJ INFRASTRUKTURI

Kantonalna direkcija za ceste Zeničko-dobojskog kantona sa sjedištem u Zenici koju po rješenju Vlade Kantona zastupa Rasim Kovač i načelnik Općine Vareš su sa firmom „Trgošped“ d.o.o. Kakanj potpisali ugovor o izvođenju radova na rekonstrukciji dijela lokalnog puta Pržići – Daštansko – Višnjici, na području općine Vareš, koji je kao investicioni projekat infrastrukture utvrđen Zaključkom Vlade Zeničko-dobojskog kantona 02-14-17714/10 od 11. 06. 2010. godine.

Naručilac Direkcija za ceste će Izvođaču za izvršene radove koji su predmet ovog Ugovora isplatiti cijenu u iznosu od 71.575,35 KM iz sredstava odobrenih Odlukom o načinu korištenja raspoloživih sredstava sa ESCROW računa.

Naručilac Općina, obavezuje se izvođaču radova obezbijediti tehničku i građevinsku dokumentaciju, kao i potrebna odobrenja za izvođenje radova, a Direkcija kao naručilac se obavezuje imenovati nadzornog organa koji će izvođača uvesti u posao.

OBILJEŽAVANJE REGIONALNOG PUTA R-444 BREZA - VAREŠ

Ovih dana je u toku obilježavanje regionalnog puta R-444 Breza – Vareš, tačnije isctavanje bijele linije koja put dijeli na dvije saobraćajne trake, a u toku je i postavljanje saobraćajnih znakova tamo gdje su trebali biti a nije ih iz nekog razloga bilo i tamo gdje su bili ali su poslužili u neke druge svrhe.

U ovome ne bi bilo ništa neobično, naprotiv, bilo bi za pohvaliti da se nije desilo da firma koja izvodi ove radove ne može da uhvati kraj cesti. Tako su i na ono malo pravca kojeg ima na dionici puta Breza – Vareš pravili krivine isctavajući bijelu liniju da li iz neznanja

i neosposobljenosti za rad na mašini koja se koristi za ove poslove ili im je bilo nedovoljno krivina pa su nam još nekoliko njih nacrtali.

Ugođaj je potpun tek u vožnji ovom dionicom, jer nikako ne možete uhvatiti cestu, imate osjećaj da vam ona neprestano izmiče, naravno ako se trudite da vozite svojom stranom i po propisima.

Na našu sreću, dok su stigli do samog grada uspjeli su se dogovoriti sa cestom koja je postala poslušnija i prestala se izmicati njihovoj kontroli, tako da su u samom gradu posao obavili mnogo bolje. U toku je obilježavanje pješačkih prelaza u gradu, pa grad dobiva jedno novo lice, nažalost već je jesen, pa ovako obilježena cesta vjerovatno neće dugo trajati.



UGOVOR O IZVOĐENJU RADOVA NA CESTOVNOJ INFRASTRUKTURI

Kantonalna direkcija za ceste Zeničko-dobojskog kantona sa sjedištem u Zenici koju po rješenju Vlade Kantona zastupa Rasim Kovač i načelnik Općine Vareš su sa firmom „Trgošped“ d.o.o. Kakanj potpisali ugovor o izvođenju radova na rekonstrukciji dijela lokalnog puta Striježovo – Kokošćići, na području općine Vareš, koji je kao investicioni projekat infrastrukture utvrđen Zaključkom Vlade Zeničko-dobojskog kantona 02-14-17714/10 od 11. 06. 2010. godine.

Naručilac Direkcija za ceste će Izvođaču za izvršene radove koji su predmet ovog Ugovora isplatiti cijenu u iznosu od 99.994,40 KM iz sredstava odobrenih Odlukom o načinu korištenja raspoloživih sredstava sa ESCROW računa. Naručilac Općina, obavezuje se izvođaču radova obezbijediti tehničku i građevinsku dokumentaciju, kao i potrebna odobrenja za izvođenje radova, a Direkcija kao naručilac se obavezuje imenovati nadzornog organa koji će izvođača uvesti u posao.

IZ PROŠLOSTI VAREŠA

U poslijepodnevnim satima 16. septembra 1980. godine, buknuo je požar na ugostiteljsko- stambenom objektu „Kasina“ u Vareš Majdanu. Za kratko vrijeme ptuno je izgorela drvena krovna konstrukcija, pa je odlučeno da se objekat sruši. Treba napomenuti da je „Kasina“ izgrađena 1910. godine kao prvi hotel u Vareš Majdanu. U prostorijama Šahovskog kluba u Varešu 31. oktobra 1985. godine održana je Osnivačka konferencija Smučarskog kluba Vareš sa ciljem omasovljenja i popularizacije zimskih sportova, posebno smučarstva. Za prvog predsjednika Ski-kluba Vareš izabran je Ignjac Dodik, za sekretara Pero Čorić za blagajnik Milica Josipović. (ZAVIČAJNA ZBIRKA)



POHOD NA VRANICU

U organizaciji Planinarsko-smučarskog društva „Perun“ Vareš, organizovan je pohod na planinu Vranicu u kojem je učestvovalo osam osoba: Aziz Numanović, Admir Čizmo, Naida Numanović, Nihad Begić, Edin Kapetanović, Hajrudin Beganović Hajro, Irfan Kamenjaš Irfo (vodič), Emir Likić (vozač).

Pohod Vranici je trajao devet sati planinarskog hoda, a odvijao se na relaciji: Jezernica – Fojnički vodozahvat – Prokoško jezero – Vrh Krstac – Vrh Ločika.

Treba napomenuti da je ovaj pohod bio veoma zahtjevan i da se odvijao po veoma zahtjevnim planinarskim stazama, jer Vrh Krstac nalazi se na 2070 mnv, a Ločika na 2107 mnv.



KNJIŽEVNA NAGRADA MAK DIZDAR STIGLA U VAREŠ

Ovogodišnjoj književnoj manifestaciji „Slovo Gorčina“ koja se održava u Stocu, a na koju se prijavljuju autori koji imaju neobjavljene zbirke pjesama, prijavio se i naš sugrađanin Mladen Marjanović sa neobjavljenom zbirkom poezije.

Književna nagrada „Mehmedalija Mak Dizdar“ na ovogodišnjoj manifestaciji „Slovo Gorčina“ pripala je upravo Marjanoviću, jer je žiri od tri zbirke poezije koje su ušle u uži izbor za prvu nagradu, za prvo mjesto odabrao upravo Marjanovićevu zbirku poezije.

Marjanović je kazao da mu ova nagrada predstavlja veliku satisfakciju za njegov rad, a posebno iz razloga što je Mak Dizdar pjesnik kojeg mnogo cijeni i čije književno djelo je svakako njegova velika inspiracija.

IZABRAN NOVI SAVJET MZ KOKOŠČIĆI

U prostorijama Doma kulture MZ „Kokošćići, 20. 09. 2010. godine izabran je novi Savjet Mjesne zajednice „Kokošćići“ i novi predsjednik ove mjesne zajednice.

Zboru građana koji je imao dvije tačke dnevnog reda, a koje su se odnosile na izbor savjeta i izbor predsjednika mjesne zajednice prisustvovalo je sedamdeset i tri stanovnika ove mjesne zajednice, koji su izglasali sedam članova Savjeta Mjesne zajednice „Kokošćići“ i novog predsjednika MZ „Kokošćići.

Novi predsjednik MZ „Kokošćići“ je Zazan Mirnel, a riječ je o mladom i školovanom momku koji će u budućnosti na adekvatan način zastupati interese MZ „Kokošćići“.

Iz matičnog ureda Vareš

(za mjesec august/kolovoz 2010.)

UMRLI:

Brkić Jasmin (1963.), Dreno Josip (1968.), Jarmanović Pavo (1943.), Dodik Zdravko (1938.), Jusić Ferid (1938.), Lovrenović Pavao (1940.), Alispahić Zlatka (1920.), Operta Hrustem (1928.).

(za mjesec septembar/rujan 2010.)

VJENČANI:

Islamović Nihad i Ajanović Reisa; Ahmedović Mirnes i Hršumović Adela; Islamović Adnan i Kamenjaš Zijada; Kevrić Rejsudin i Dovađija Arnela; Operta Nedžad i Parić Mubera.



Na osnovu člana 11. Odluke Općinskog vijeća Vareš o kriterijima za dodjelu stipendija redovnim studentima broj: 01-73/09 od 26.03.2009., Služba za društvene djelatnosti i boračko-invalidsku zaštitu općine Vareš r a s p i s u j e

KONKURS

za dodjelu 9 stipendija redovnim studentima visokoškolskih ustanova

za studijsku 2010/2011 godinu

I

Općinsko vijeće Vareš iz općinskog budžeta za 2010. godinu izdvaja sredstva namijenjena za: dodjelu stipendija redovnim studentima koji studiraju na visokoškolskim ustanovama u Bosni i Hercegovini i studentima koji studiraju van Bosne i Hercegovine, a imaju prebivalište na području općine Vareš .

Pravo učešća na Konkursu nemaju kandidati :

- a) studenti-apsolventi;
- b) studenti koji u tekućoj studentskoj godini na istom ili drugom fakultetu ponovno upisuju istu godinu studija
- c) studenti koji su na vanrednom ili studiju za vlastite potrebe
- d) studenti koji primaju stipendiju ili kredit drugog davaoca

II

Kriteriji na osnovu kojih se vrši bodovanje su :

- ostvareni uspjeh u školovanju (prosječna ocjena)
- godina studija
- socijalno ekonomski status

III

Proceduru konkursa, bodovanje i izbor kandidata vrši općinska Služba za društvene djelatnosti i BIZ.

Uz prijavu za konkurs kandidati prilažu sljedeću dokumentaciju :

- Fotokopiju lične karte
- Potvrdu o prebivalištu (PBA-1)
- Potvrda o upisu studijske godine kao redovan student prvi put
- Svjedodžbe I-IV razreda srednje škole (za studente prve godine)
- Potvrdu sa ocjenama o položenim ispitima i izvedenom prosječnom ocjenom iz prethodnih godina studija
- Ovjerena kućna lista
- Uvjerenje ili potvrda o primanjima za svakog punoljetnog člana domaćinstva
- Potvrda o nezaposlenosti za svakog punoljetnog člana domaćinstva
- Uvjerenje o statusu djeteta bez oba roditelja
- Uvjerenje Centra za socijalni rad Vareš da je student član porodice evidentirane u Ustanovi kao porodica u stanju socijalne potrebe ili porodice koja je korisnik nekog prava (privremenog ili stalnog).
- Fotokopija bankovne kartice ili ugovora sa brojem tekućeg računa studenta

Dokumenti koji se dostavljaju kao dokaz o ispunjavanju uslova moraju biti originali ili ovjerene fotokopije

IV

Konkurs je otvoren od 04. 10. 2010. do 22. 10. 2010. godine.

Prijave na konkurs možete preuzeti u

Općini Vareš, u Šalter-sali, na šalteru Službe za društvene djelatnosti i BIZ-u.

Svu traženu dokumentaciju uz prijavu dostaviti na Protokol općine .

Neblagovremene prijave ili prijave sa nepotpunom dokumentacijom neće se uzimati u razmatranje.

Dostavljena dokumentacija se ne vraća



Na temelju članka 22. stavak 1. točka 24. Statuta Općine Vareš, broj: 01-25/09 od 29.01. 2009. godine, a u vezi s odredbama Memoranduma o razumijevanju između općine Vareš i Projekta upravne odgovornosti – GAP II. Faza, Općinsko vijeće Vareš, na 2. izvanrednoj sjednici održanoj dana 22.09. 2010. godine, d o n o s i

ODLUKU

o provođenju općinskog akcijskog plana (MAP) u suradnji s Projektom

upravne odgovornosti (GAP)

Članak 1.

Općina Vareš kao partner u implementaciji projekta GAP II, koji financiraju vlade SAD-a, Švedske i Nizozemske s ciljem daljnjeg razvoja općinskih usluga i demokratske, odgovorne vlasti u Bosni i Hercegovini, nastavlja suradnju s projektom GAP.

Općinsko vijeće Vareš konstatira da je u proteklom razdoblju općinska uprava postigla značajne rezultate u suradnji s Projektom GAP, kao što je uspostavljanje Centra za pružanje usluga građanima i Centra za izdavanje dozvola iz oblasti urbanizma i građenja, unapređenje financijskog upravljanja, razvoj urbanizma i planiranje kapitalnih projekata.

Članak 2.

Nastavak suradnje u cilju postizanja daljnjih rezultata, a za dobrobit građana Općine Vareš, pored ostalog, uključuje unapređenje upravljanja proračunom, planiranje kapitalnih projekata, maksimiziranje prihoda, pristup tržištu konzultantskih usluga, kao i sufinansiranje kapitalnih projekata.

Dio GAP-ove pomoći Općini Vareš definirao se prema potrebama Općine u obliku Općinskog akcijskog plana (skraćeno MAP) u cilju čije izrade je

formirana općinska radna grupa (MAP radna grupa).

Članak 3.

Općinskom vijeću Vareš je poznato da je osoblje GAP-a općinskoj radnoj grupi osiguralo trening i tehničku podršku po pitanju selekcije projekata za unapređenje rada organa uprave i njihove buduće implementacije. Uz informiranje Općinskog vijeća Vareš i uvažavajući mišljenja građana, a na temelju GAP-ovih kriterija za odabir projekata, MAP radna grupa je pripremila prijedlog liste projekata u kojima će GAP osigurati materijalnu i tehničku podršku.

U cilju otpočinjanja izrade konkretnih općinskih akcijskih planova i pristupanja njihovoj implementaciji, Općinsko vijeće Vareš daje suglasnost na Općinski akcijski plan (MAP), koji je sastavni dio ove odluke.

Članak 4.

Općinsko vijeće Vareš daje podršku MAP radnoj grupi za nastavak predviđenih aktivnosti, kao što je izrada detaljnog plana implementacije za projekte izabrane od strane MAP radne grupe u suradnji s GAP-om i njihova implementacija.

MAP radna grupa dužna je redovito izvještavati Općinsko vijeće Vareš o svojim aktivnostima na izradi akcijskih planova i implementaciji projekata.

Članak 5.

Ova odluka stupa na snagu osmog dana od dana objavljivanja na općinskoj oglasnoj ploči, a objavit će se i u "Informativnom biltenu Općine Vareš".

Ova odluka objavljena je na oglasnoj ploči Općine Vareš dana 23.09. 2010. godine.